


陶靖節集

五之八



漢書門			
類	號	函	架
二	三	七	〇
一	二	三	七
六	七	〇	大
冊	架	函	冊


內閣文庫			
漢書	類	號	冊
二	三	七	六
一	二	三	七
三	四	函	一
七	架	冊	架

內閣文庫		
番號	漢	11137
冊數	6 ( 5 )	
函號	314	191

葛陶合刻

共六







陶靖節集卷之五

賦 詞 傳 記 疏 祭文

感士不遇賦 并序

昔董仲舒作士不遇賦司馬子長又爲  
之余嘗以三餘之日講習之暇讀其文  
慨然惆悵夫履信思順生人之善行抱  
朴守靜君子之篤素自真風告逝大偽  
斯興閭閻懈廉退之節市朝驅易進之  
心懷正志道之士或潛玉於當年潔已

淺草文庫

清操之人或沒世以徒勤故夷皓有安  
歸之歎三閭發已矣之哀悲夫寓形百  
年而瞬息已盡立行之難而一城莫賞  
此古人所以染翰慷慨屢伸而不能已  
者也夫導達意氣其惟文乎撫卷躊躇  
遂感而賦此

咨大塊之受氣何斯人之獨靈稟神智以藏照  
秉三五而垂名或擊壤以自歡或大濟於蒼生  
靡潛躍之非分常傲然以稱情世流浪而遂徂

物羣分以相形密網裁而魚駭宏羅制而鳥驚  
彼達人之善覺乃逃祿而歸耕山嶷嶷而懷影  
川汪汪而藏聲望軒唐而永歎甘貧賤以辭榮  
淳源汨以長分美惡作以異途原百行之攸貴  
莫爲善之可娛奉上天之成命師聖人之遺書  
發忠孝於君親生信義於鄉閭推誠心而獲顯  
不矯然而祈譽嗟乎雷同毀異物惡其上妙筭  
者謂迷直道者云妄坦至公而無猜卒蒙恥以  
受謗雖懷瓊而握蘭徒芳潔而誰亮哀哉士之

不遇已不在炎帝帝魁之世獨祇脩以自勤豈  
三省之或廢庶進德以及時時既至而不惠無  
爰生之晤言念張季之終蔽愍馮叟於郎署賴  
魏守以納計雖僅然於必知亦苦心而曠歲審  
夫市之無虎眩三夫之獻說悼賈傅之秀朗紆  
遠轡於促界悲董相之淵致屢乘危而幸濟感  
哲人之無偶淚淋浪以灑袂承前王之清誨曰  
天道之無親澄得一以作鑒恒輔善而佑仁夷  
投老以長饑回早夭而又貧傷請車以備擲悲

茹薇而殞身雖好學與行義何死生之苦辛疑  
報德之若茲懼斯言之虛陳何曠世之無才罕  
無路之不澀伊古人之慷慨病奇名之不立廣  
結髮以從政不愧賞於萬邑屈雄志於戚豎竟  
尺土之莫及畱誠信於身後慟衆人之悲泣商  
盡規以拯弊言始順而患入奚良辰之易傾胡  
害勝其乃急蒼旻遐緬人事無已有感有味疇  
測其理寧固窮以濟意不委曲而累已既軒冕  
之非榮豈緼袍之爲恥誠謬會以取拙且欣然

而歸止擁孤襟以畢歲謝良價於朝市

韻語陽秋曰藝經云壤以木為之前廣  
後狹長尺四寸濶三寸其形如履將戲  
先側擊壤於地遠三四十步以手中壤  
擊之中者為上蓋古戲也

閑情賦 并序

初張衡作定情賦蔡邕作靜情賦檢逸  
辭而宗澹泊始則蕩以思慮而終歸閑  
正將以抑流宕之邪心諒有助於諷諫

綴文之士奕代繼作竝因觸類廣其辭  
義余園閭多暇復染翰為之雖文妙不  
足庶不謬作者之意乎

夫何瓌逸之令姿獨曠世以秀群表傾城之艷  
色期有德於傳聞佩鳴玉以比潔齊幽蘭以爭  
芬淡柔情於俗內負雅志於高雲悲晨曦之易  
夕感人生之長勤同一盡於百年何歡寡而愁  
殷褰朱幃而正坐汎清瑟以自欣送纖指之餘  
好攘皓袖之繽紛瞬美日以流眄含言笑而不

分曲調將半景落西軒悲商叩林白雲依山仰  
睇天路俯促鳴絃神儀嫵媚舉止詳妍激清音  
以感余願接膝以交言欲自往以結誓懼冒禮  
之爲僞待鳳鳥以致辭恐他人之我先意惶惑  
而靡寧魂須臾而九遷願在衣而爲領承華首  
之餘芳悲羅襟之宵離怨秋夜之未央願在裳  
而爲帶束窈窕之纖身嗟溫涼之異氣或脫故  
而服新願在髮而爲澤刷玄鬢於頰肩悲佳人  
之屢沐從白水以枯煎願在眉而爲黛隨瞻視

以閒揚悲脂粉之尚鮮或取毀於華粧願在莞  
而爲席安弱體於三秋悲文茵之代御方經年  
而見求願在絲而爲履附素足以周旋悲行止  
之有節空委棄於床前願在晝而爲影常依形  
而西東悲高樹之多蔭慨有時而不同願在夜  
而爲燭照玉容於兩楹悲扶桑之舒光奄滅景  
而藏明願在竹而爲扇含凄颺於柔握悲白露  
之晨零顧襟袖以緬邈願在木而爲桐作膝上  
之鳴琴悲樂極以哀來終推我而輟音考所願

而必違徒契契以苦心擁勞情而罔訴步容與  
於南林栖木蘭之遺露翳青松之餘陰儻行行  
之有覲交欣懼於冲襟竟寂寞而無見獨悄悄  
以空尋歛輕裾以復路瞻夕陽而流歎步徙倚  
以志趣色慘悽而矜顏葉變變以去條氣淒淒  
而就寒日負影以偕沒月媚景於雲端鳥悽聲  
以孤歸獸索偶而不還悼當年之晚暮恨茲歲  
之欲殫思宵夢以從之神飄飄而不安若憑舟  
之失棹譬緣崖而無攀於時畢昴盈軒北風淒

淒惘惘不寐衆念徘徊起攝帶以伺晨繁霜粲  
於素階雞歛翅而未鳴笛流遠以清哀始妙密  
以閒和終寥亮而藏摧意夫人之在茲託行雲  
以送懷行雲逝而無語時奄冉而就過宋本云  
行雲逝  
而不我留時亦  
奄冉而就過徒勤思以自悲終阻山而帶河  
迎清風以祛累寄弱志於歸波尤蔓草之爲會  
誦邵南之餘歌坦萬慮以存誠憇遙情於八遐

昭明太子序云白璧微瑕惟在閑情一

賦○東坡曰淵明作閑情賦所謂國風



好色而不淫與屈宋所陳何異而統大  
譏之此乃小兒強作解事者

歸去來兮辭

并序

余家貧耕植不足以自給幼稚盈室餅  
無儲粟生生所資未見其術親故多勸  
余爲長吏脫然有懷求之靡途會有四  
方之事諸侯以惠愛爲德家叔以余貧  
苦遂見用於小邑于時風波未靜心憚  
遠役彭澤去家百里公田之利足以爲

酒故便求之及少日眷然有歸與之情  
何則質性自然非矯厲所得饑凍雖切  
違已交病嘗從人事皆口腹自役於是  
悵然慷慨深媿平生之志猶望一稔當  
歛裳宵逝尋程氏妹喪於武昌情在駿  
奔自免去職仲秋至冬在官八十餘日  
因事順心命篇曰歸去來兮乙巳歲十  
一月也

歸去來兮田園將蕪胡不歸旣自以心爲形役

奚惆悵而獨悲悟已往之不諫知來者之可追  
寔迷途其未遠覺今是而昨非舟遙遙以輕颺  
風飄飄而吹衣問征夫以前路恨晨光之熹微  
乃瞻衡宇載欣載奔僮僕歡迎稚子候門三徑  
就荒松菊猶存携幼入室有酒盈罇引壺觴以  
自酌眄庭柯以怡顏倚南窓以寄傲審容膝之  
易安園日涉以成趣門雖設而常關策扶老以  
流憩時矯首而遐觀雲無心而出岫鳥倦飛而  
知還景翳翳以將入撫孤松而盤桓歸去來兮

請息交以絕游世與我而相違復駕言兮焉求  
悅親戚之情話樂琴書以消憂農人告余以春  
及將有事於西疇或命中車或棹孤舟既窈窕  
以尋壑亦崎嶇而經丘木欣欣以向榮泉涓涓  
而始流始音試善萬物之得時感吾生之行休已  
矣乎寓形宇內復幾時曷不委心任去畱胡爲  
乎遑遑兮欲何之富貴非吾願帝鄉不可期懷  
良辰以孤往或植杖而耘耔登東臯以舒嘯臨  
清流而賦詩聊乘化以歸盡樂夫天命復奚疑

扶老藤也見後漢書蔡順傳註又談助云叩竹可為杖謂之扶老

歐陽文忠公曰晉無文章惟陶淵明歸去來兮辭一篇而已

朱文公曰其詞義夷曠蕭散雖託楚聲而無尤怨切蹙之病

東坡曰俗傳書生入官庫見錢不識或怪而問之生曰固知其為錢但怪其不在紙裏中淵明歸去來辭云鉶無儲粟

此翁平生只於鉶中見粟也耶

五柳先生傳 并贊

先生不知何許人也亦不詳其姓字宅邊有五柳樹因以為號焉閒靜少言不慕榮利好讀書不求甚解每有會意便欣然忘食性嗜酒家貧不能常得親舊知其如此或置酒而招之造飲輒盡期在必醉既醉而退曾不吝情去畱環堵蕭然不蔽風日短褐穿結簞瓢屢空晏如也常著文章自娛頗示已志忘懷得失以此自終

贊曰

黔婁有言不戚戚於貧賤不汲汲於富貴味其  
言茲若人之儔乎酬觴賦詩以樂其志無懷氏  
之民歟葛天氏之民歟

不末其藝苑雌黃曰士人言縣令事多用彭澤

五株柳雖白樂天六帖亦然以余考之

陶淵明潯陽柴桑人也宅邊有五柳樹

因號五柳先生後為彭澤令去家百里

則彭澤未嘗有五柳也予初論此人或

不然其說比觀南部新書云晉書陶淵

明本傳宅邊有五柳樹因以為號焉即

非彭澤令時所栽人多於縣令事使五

柳誤也

茗溪漁隱曰沈彬詩陶潛彭澤五株柳

潘岳河陽一縣花皆誤用也

晉故征西大將軍長史孟府君傳

并贊

君諱嘉字萬年江夏鄂人也曾祖父宗以孝行

稱仕吳司馬祖父揖元康中為廬陵太守宗葬

陶集 十一  
武昌新陽縣子孫家馬遂爲縣人也君少失父  
奉母二弟居娶大司馬長沙桓公陶侃第十女  
閨門孝友人無能間鄉閭稱之冲默有遠量弱  
冠儔類咸敬之同郡郭遜以清操知名時在君  
右常歎君溫雅平曠自以爲不及遜從弟立亦  
有才志與君同時齊譽每推服焉由是名冠州  
里聲流京邑太尉潁川庾亮以帝舅民望受分  
陝之重鎮武昌并領江州辟君部廬陵從事下  
郡還亮引見問風俗得失對曰嘉不知還傳當

問從吏亮以麈尾掩口而笑諸從事旣去喚弟  
翼語之曰孟嘉故是盛德人也君旣辭出外自  
除吏便步歸家母在堂兄弟共相歡樂怡怡如  
也旬有餘日更版爲勸學從事時亮崇脩學校  
高選儒官以君望寔故應尚德之舉大傅河南  
褚裒簡穆有器識時爲豫章太守出朝宗亮正  
旦大會州府人士率多時彥君在坐次甚遠裒  
問亮江州有孟嘉其人何在亮云在坐卿但自  
覓裒歷觀遂指君謂亮曰將無是耶亮欣然而

笑喜哀之得君奇君爲哀之所得乃益器焉舉秀才又爲安西將軍庾翼府功曹再爲江州別駕巴丘令征西大將軍譙國桓溫參軍君色和而正溫甚重之九月九日溫游龍山參佐畢集四第二甥咸在坐時佐吏竝著戎服有風吹君帽墮落溫目左右及賓客勿言以觀其舉止君初不自覺良久如廁溫命取以還之廷尉太原孫盛爲諮議參軍時在坐溫命紙筆令嘲之文成示溫溫以著坐處君歸見嘲笑而請筆作答

了不容思文辭超卓四座歎之奉使京師除尚書刪定郎不拜孝宗穆皇帝聞其名賜見東堂君辭以脚疾不任拜起詔使人扶入君嘗爲刺史謝永別駕永會稽人喪亡君求赴義路由永興高陽許詢有雋才辭榮不仕每縱心獨往客居縣界嘗乘船近行適逢君過歎曰都邑美士吾盡識之獨不識此人唯聞中州有孟嘉者將非是乎然亦何由來此使問君之從者君謂其使曰本心相過今先赴義尋還就君及歸遂止

信宿雅相知得有若舊交還至轉從事中郎俄  
遷長史在朝墮然仗正順而已門無雜賓嘗會  
神情獨得便超然命駕逕之龍山顧景酣宴造  
夕乃歸溫從容謂君曰人不可無勢我乃能駕  
御卿後以疾終於家年五十一始自總髮至於  
知命行不苟合言無夸矜未嘗有喜愠之容好  
酣飲逾多不亂至於任懷得意融然遠寄傍若  
無人溫嘗問君酒有何好而卿嗜之君笑而答  
曰明公但不得酒中趣爾又問聽伎絲不如竹

竹不如肉答曰漸近自然中散大夫桂陽羅含  
賦之曰孟生善酣不愆其意光祿大夫南陽劉  
耽昔與君同在溫府淵明從父太常夔嘗問耽  
君若在當已作公否答云此本是三司人爲時  
所重如此淵明先親君之第四女也凱風寒泉  
之思寔鍾厥心謹按採行事撰爲此傳懼或乖  
謬有虧大雅君子之德所以戰戰兢兢若履深  
薄云爾

贊曰

陶集  
孔子稱進德脩業以及時也君清蹈衡門則令  
聞孔昭振纓公朝則德音允集道悠運促不終  
遠業惜哉仁者必壽豈斯言之謬乎

桃花源記

并詩

晉太元中武陵人捕魚爲業緣溪行忘路之遠  
近忽逢桃花林夾岸數百步中無雜樹芳草鮮  
美落英繽紛漁人甚異之復前行欲窮其林林  
盡水源便得一山山有小口髣髴若有光便捨  
船從口入初極狹纔通人復行數十步豁然開

朗土地平曠屋舍儼然有良田美池桑竹之屬  
阡陌交通雞犬相聞其中往來種作男女衣著  
悉如外人黃髮垂髫並怡然自樂見漁人乃大  
驚問所從來具答之便要還家設酒殺雞作食  
村中聞有此人咸來問訊自云先世避秦時亂  
率妻子邑人來此絕境不復出焉遂與外人間  
隔問今是何世乃不知有漢無論魏晉此人一  
一爲具言所聞皆歎惋餘人各復延至其家皆  
出酒食停數日辭去此中人語云不足爲外人



陶集  
道也既出得其船便扶向路處處誌之及郡下  
詣太守說如此太守卽遣人隨其往尋向所誌  
遂迷不復得路南陽劉子驥高尚士也聞之欣  
然親往未果尋病終後遂無問津者  
嬴氏亂天紀賢者避其世黃綺之商山伊人亦  
云逝往迹浸復湮來逕遂蕪廢相命肆農耕日  
入從所憩桑竹垂餘蔭菽稷隨時藝春蠶取長  
絲秋熟靡王稅荒路曖交通鷄犬互鳴吠俎豆  
猶古法衣裳無新製童孺縱行歌斑白歡游詣

草榮識節和木衰知風勵雖無紀曆誌四時自  
成歲怡然有餘樂于何勞智慧奇蹤隱五百一  
朝敞神界淳薄旣異源旋復還幽蔽借問游方  
士焉測塵囂外願言躡輕風高舉尋吾契

唐子西曰唐人詩云山僧不解數甲子  
一葉落知天下秋及觀淵明雖無紀曆  
誌四時自成歲便覺唐人費力尚不知  
有漢無論魏晉可見造語之簡妙

東坡曰世傳桃源事多過其實考淵明

所記止言先世避秦亂來此則漁人所見似是其子孫非秦人不死者也又云殺雞作食豈有仙而殺者乎舊說南陽有菊水水甘而芳居民三十餘家飲其水皆壽或至百二三十歲蜀青城山老人村有五世孫者道極險遠生不識鹽醯而溪中多枸杞根如龍蛇飲其水故壽近歲道稍通漸能致五味而壽益衰桃源蓋此比也使武陵太守得至焉則

已化爲爭奪之場久矣常意天壤間若此者甚衆不獨桃源

胡仔曰東坡此論蓋辯證唐人以桃源爲神仙如王摩詰劉夢得韓退之作桃源行是也惟王介甫作桃源行與東坡之論合

時偉按漁人太守記初不言姓名而註自添足非原有姓名而以不道破爲妙也南陽劉子驥何嘗不道姓名至妄指

桃源山妄作桃源經從空虛中迷謬執  
著夢中說夢不特甚解之過○文字清  
空千年絕調醉鄉毛穎祖之而不免結  
撰矣帛道猷茅茨隱不見雞鳴知有人  
李太白一往桃花源千春隔流水彷彿  
此境王摩詰牛羊自歸村巷童穉不識  
衣冠殊勝其桃源行

與子儼等疏

告儼俟份佚佟天地賦命生必有死自古賢聖

誰能獨免子夏有言死生有命富貴在天四友  
之人親受音旨發斯談者將非窮達不可妄求  
壽夭永無外請故耶吾年過五十少而窮苦每  
以家弊東西游走性剛才拙與物多忤自量爲  
已必貽俗患僂俛辭世使汝等幼而饑寒余嘗  
感儒仲賢妻之言敗絮自擁何慙兒子此旣一  
事矣但恨鄰靡二仲室無萊婦抱茲苦心良獨  
內媿少學琴書偶愛閒靜開卷有得便欣然忘  
食見樹木交蔭時鳥變聲亦復歡然有喜常言

陸集  
五六月中北窻下臥遇涼風暫至自謂是羲皇  
上人意淺識罕謂斯言可保日月遂往機巧好  
疎緬求在昔眇然如何病患以來漸就衰損親  
舊不遺每以藥石見救自恐大分將有限也汝  
輩稚小家貧每役柴水之勞何時可免念之在  
心若何可言然汝等雖不同生當思四海皆兄  
弟之義鮑叔管仲分財無猜歸生伍舉班荆道  
舊遂能以敗爲成因喪立功他人尚爾況同父  
之人哉潁川韓元長漢末名士身處卿佐七十

而終兄弟同居至於沒齒濟北凡音稚春晉時  
操行人也七世同財家人無怨色詩曰高山仰  
止景行行止雖不能爾至心尚之汝其慎哉吾  
復何言

王霸傳霸字儒仲列女傳霸少立高節  
光武時連徵不仕霸與同郡令狐子伯  
爲友後子伯爲楚相而其子爲郡功曹  
子伯遣子奉書於霸客去而久臥不起  
妻怪問其故霸曰向見令狐子容服甚

陶集  
光舉措有適而我兒蓬髮歷齒未知禮  
則見客而有慚色父子恩深不覺自失  
耳妻曰君少脩清節不顧榮祿今子伯  
之貴孰與君之高君躬勤苦子安得不  
耕以養既耕安得不黃頭歷齒奈何忘  
宿志而慙兒女子乎霸屈起而笑曰有  
是哉遂共終身隱遯○嵇康高士傳求  
仲羊仲皆治車爲業挫廉逃名蔣元卿  
之去兗州還杜陵荆棘塞門舍中有三

徑不出唯二人從之游時人謂之二仲  
○劉向列女傳楚老萊子逃世耕於蒙  
山之陽莞葭爲牆蓬蒿爲室王使人聘  
以璧帛不來王遂駕至老萊之門老萊  
方織畚王曰願先生臨之老萊子曰僕  
山野之人也不足以守政王復曰願終  
變先生之志老萊子曰諾王去有間其  
妻戴畚挾薪而來謂老萊子曰是何車  
跡之衆也老萊子曰楚王欲使吾守楚

國之政妻曰子許之乎老萊子曰然妻  
曰妾聞之可食以酒肉者可隨以鞭捶  
可授以官祿者可隨以鈇鉞今先生食  
人之酒肉受人之官祿此皆人之所制  
也居亂世而爲人所制能免於患乎老  
萊子遂隨其妻至於江南而止

祭程氏妹文

維晉義熙三年五月甲辰程氏妹服制再周淵  
明以少牢之奠俛而酌之嗚呼哀哉寒往暑來

日月寢疎梁塵委積庭草荒蕪寥寥空室哀哀  
遺孤肴觴虛奠人逝焉如誰無兄弟人亦同生  
嗟我與爾特百常情慈妣早世時尚孺嬰我年  
二六爾纔九齡爰從靡識撫髻相成咨爾令妹  
有德有操靖恭鮮言聞善則樂能正能和惟友  
惟孝行止中閨可象可倣我聞爲善慶自己蹈  
彼蒼何偏而不斯報昔在江陵重罹天罰兄弟  
索居乖隔楚越伊我與爾百哀是切黯黯高雲  
蕭蕭冬月白雲掩晨長風悲節感惟崩號興言

泣血尋念平昔觸事未遠書疏猶存遺孤滿眼  
如何一往終天不返戚戚高堂何時復踐藐藐  
孤女曷依曷恃笑笑遊魂誰主誰祀奈何程妹  
於此永已死如有知相見蒿里嗚呼哀哉

祭從弟敬遠文

歲在辛亥月惟仲秋旬有九日從弟敬遠卜辰  
云窆永寧右土感平生之遊處悲一往之不返  
情惻惻以摧心淚愍愍而盈眼乃以園果時醪  
祖其將行嗚呼哀哉於鑠我弟有操有槩孝發

幼齡友自天愛少思寡欲靡執靡介後已先人  
臨財思惠心遺得失情不依世其色能溫其言  
則厲樂勝朋高好是文藝遙遙帝鄉爰感奇心  
絕粒委務考槃山陰淙淙懸澗曖曖荒林晨採  
上藥夕閒素琴日仁者壽竊獨信之如何斯言  
徒能見欺年甫過立奄與世辭長歸蒿里邈無  
還期惟我與爾匪但親友父則同生母則從母  
相及齟齬竝罹偏咎斯情實深斯愛實厚念疇  
昔日同房之歡冬無緼褐夏渴瓢簞相將以道

相開以顏豈不多之忽忘饑寒余嘗學仕纏縣  
人事流浪無成懼負素志歛策歸來爾知我意  
常願携手寘彼衆意每憶有秋我將其刈與汝  
偕行舫舟同濟三宿水濱樂飲川界靜月澄高  
溫風始逝撫杯而言物久人脆奈何吾弟先我  
離世事不可尋思亦何極日徂月流寒暑代息  
死生異方存亡有域候晨永歸指塗載陟呱呱  
遺稚未能正言哀哀嫠人禮儀孔閑庭樹如故  
齋宇廓然孰云敬遠何時復還余惟人斯昧茲

近情著龜有吉制我祖行望旒翩翩執筆涕盈  
神其有知昭余中誠嗚呼哀哉

自祭文

歲惟丁卯律中無射天寒夜長風氣蕭索陶子  
將辭逆旅之館永歸於本宅故人悽其相悲同  
祖行於今夕羞以嘉蔬薦以清酌候顏已冥聆  
音愈漠嗚呼哀哉茫茫大塊悠悠高旻是生萬  
物余得爲人自余爲人逢運之貧簞瓢屢罄絺  
綌冬陳含歡谷汲行歌負薪翳翳柴門事我宵



陶靖節集卷之五  
三  
晨春秋代謝有務中園載耘載耔迺育迺繁欣  
以素牘和以七絃冬曝其日夏濯其泉勤靡餘  
勞心有常閒樂天委分以致百年惟此百年夫  
人愛之懼彼無成愒日惜時存爲世珍沒亦見  
思嗟我獨邁曾是異茲寵非已榮涅豈吾緇粹  
兀窮廬酣飲賦詩識運知命疇能罔眷余今斯  
化可以無恨壽涉百齡身慕肥遁從老得終奚  
所復戀寒暑逾邁亡旣異存外姻晨來良友宵  
奔葬之中野以安其魂窅窅我行蕭蕭墓門奢

耻宋臣儉笑王孫廓兮已滅慨焉已遐不封不  
樹日月遂過匪貴前譽孰重後歌人生寔難死  
如之何嗚呼哀哉

東坡曰淵明自祭文出妙語於續息之  
餘豈涉死生之流哉

東甞曰既明自祭文出效語亦蘇息之

收之何無和哀若

樹日日多豈謂貴而譽煇重於福入坐宴鑿及  
頃宋曰劍笑王紆痺令曰然則豈曰選不挂不

陶靖節集卷之六

傳贊述

天子孝傳贊

虞舜

夏禹

殷高宗

周文王

虞舜父頑母嚚事之於畎畝之間以孝烝烝是  
以堯聞而授之富有天下貴為天子以為不順  
於父母若窮而無歸惟聞親可以得意苟違朝  
夕若嬰兒之思戀故稱舜五十而慕書曰憂擊

陶集  
鳴球搏拊琴瑟以詠祖考來格言思其來而訓  
之愛敬盡於事親是以德教加於百姓刑於四  
海

夏禹有天下以奉宗廟然躬自菲薄以厚其孝  
孔子曰禹吾無間然矣菲飲食而致孝乎鬼神  
惡衣服而致美乎黻冕禹之德於是稱聞聖人  
之德無以加於孝敬孝敬之道美莫大焉

殷高宗諒陰三年不言百官總已而聽於冢宰  
三年而後言天下咸歡德教大行殷道以興詩

曰一人有慶兆民賴之其此之謂乎

周文王之爲世子也朝於王季日三雞鳴至於  
寢門問於內豎內豎曰安文王乃喜不安則色  
憂行不能正履日中暮亦如之食上必視寒溫  
之節食下必問所膳而後退文王孝道光大其  
化自近至遠刑于寡妻以御于家邦故得萬國  
之歡心以事其先王矣

贊曰

至哉后德聖敬自天陶漁致養菲薄享先親瘠

色憂諒陰寢言一人有慶千載賴旃

諸侯孝傳贊

周公旦

魯孝公

河間惠王

周公旦武王之弟成王幼少周公攝政制禮作樂郊祀后稷以配天宗祀文王於明堂以配上帝是以四海之內各以其職來祭詩曰於穆清廟肅雍顯相言諸侯樂其位而敬其事也仲尼曰孝莫大於嚴父嚴父莫大於配天則周公其人也貴而不驕位高彌謙自承文武之休烈孝

道通於神明光被四海武王封之於魯備其禮樂以奉宗廟焉

魯孝公之爲公子周宣王問公子能道訓諸侯者立之樊穆仲稱其孝曰肅恭明神而敬事耆老賦事行刑必問於遺訓咨於故寔不干所問不犯所咨王曰然則能訓理其民矣乃命之於夷宮是爲孝公夫宗廟致敬不忘親也有國不亦宜乎

漢河間惠王獻王之曾孫也西京藩臣多驕放

隋集  
之失其名德者唯獻王而惠王繼之漢書稱其  
能脩獻王之行母薨服喪盡禮哀帝下詔書褒  
揚以爲宗室儀表增封萬戶禮古之人皆然至  
於末俗衰薄固已賢矣貴而率禮又難其見褒  
賞不亦宜乎

贊曰

貴驕殊途不期而會周公勞謙乃成光大二侯  
承魯遵儉去泰河間率禮漢宗是賴

卿大夫孝傳贊

孔子

孟莊子

穎考叔

孔子魯人也入則事父兄出則事公卿喪事不  
敢不勉故稱曰孝乎惟孝友于兄弟是亦爲政  
也君賜腥必熟而薦之雖蔬食而齊祭如在鄉  
人儻朝服立於阼階孝之至也至德要道莫大  
於孝是以曾參受而書之游夏之徒常咨稟焉  
許止不嘗藥書以殺父宰我暫言減喪責以不  
仁言合訓典行合世範德義可尊作事可法遺  
文不朽揚名千載

孟莊子魯人也孔子稱其孝其他可能也其不改父之政與父之臣是難能也夫孝子之事親也事亡如事存故當不義則爭之存所不爭則亡亦不敢改父之道猶謂之孝况終身乎

穎考叔鄭人也莊公以叔段之故與母誓曰不及黃泉無相見也既而悔之考叔爲封人聞之有獻於公公賜之食而舍肉公問之對曰小人有母未嘗君之羹請以遺之公曰汝有母遺繫我獨無考叔曰何謂也公語之故且告之悔考

叔曰若掘地及泉隧而相見其誰曰不然公從之遂爲母子如初君子曰穎考叔純孝也愛其母而施及莊公詩云孝子不匱永錫爾類其是之謂乎

贊曰

仁惟本悌聖亦基孝恂恂尼父固天攸造二子承親式禮遵誥永錫純懿無改遺操

士孝傳贊

高柴

樂正子春

孔奮

黃香

高柴衛人也喪親泣血三年未嘗見齒所謂哭不偯言不文也為武城宰而化行民有不服其親者改之行喪如禮君子之德風也以身先之而民不遺其親

樂正子春魯人也下堂傷足既瘳數月不出猶有憂色曰吾聞之曾子父母全而生之已全而歸之可謂孝矣故君子一舉足一出言不敢忘父母不敢毀傷孝之始也夫能敬慎若斯而災

患及者未之有也

孔奮扶風人也少以孝行著名州里供養至謹在官唯母極甘美妻息菜食歷位以清夫人情莫不欲厚其親然亦有分焉奮則難繼能致儉以全養者鮮矣

黃香江夏人也九歲失母思慕骨立事父竭力以致養冬無被袴而盡滋味暑則扇牀枕寒則以身溫席漢和帝嘉之特加異賜歷位恭勤寵祿榮親可謂夙興夜寐無忝爾所生者也

贊曰

顯允羣士行如名鈞咸能夙夜以義榮親率彼城邑用化厥民忠以悟主其孝乃純

庶人孝傳贊

江革

廉範

汝郁

殷陶

江革齊人也漢章帝時避賊負母而逃賊賢之不害而告其生路竭力傭債以致甘煖和顏悅色以盡歡心欲親之安自挽車以行鄉人歸之

號曰江巨孝位至五官中郎將天子嘉焉寵遇

甚厚告歸詔書褒美就家禮其終身以顯

異行

廉範京兆人也少孤十五入蜀迎父喪遇石船覆範抱棺而沒船人救之僅免於死遂以喪歸及仕郡拯太守於危難送故盡節章帝時為郡守百姓歌詠之夫孝者人之本教之所由生也是以範之臨危也勇宰民也惠能以義顯也

汝郁陳郡人也五歲母病不食郁亦不食母憐之強食郁能察色知病輒復不食族人號曰異



陶集  
童年十五著於鄉里父母終思慕致委推財與  
兄弟隱於草澤君子以爲難况童齒亂孝於自然  
可謂天性也

殷陶汝南人也年十二以孝稱遭父憂率情合  
禮有長蛇帶其門舉家奔走陶以喪柩在焉獨  
居廬不動親戚扶持曉諭莫能移之啼號益盛  
由是顯名屢辭辟命夫智者不惑勇者不懼陶  
孝於其親而智勇竝彰乎弱齡斯又難矣

贊曰

事親盡歡其難在色彼養以祿我養以力義存  
愛敬榮不假飾嗟爾衆庶鑒茲前式

扇上畫贊

荷篠丈人 長沮桀溺 於陵仲子

張長公 丙曼容 鄭次都

薛孟嘗 周陽珪

三五道邈淳風日盡九流參差互相推隕形逐  
物遷心無常準是以達人有時而隱四體不勤  
五穀不分超超丈人日夕在耘遼遼沮溺耦耕

自欣入鳥不駭雜獸斯群至矣於陵養氣浩然  
蔑彼結駟甘此灌園張生一仕曾以事還顧我  
不能高謝人間岩岩丙公望崖輒歸匪驕匪吝  
前路威夷鄭叟不合垂釣川湄交酌林下清言  
究微孟嘗游學天網時疎眷言哲友振褐偕徂  
美哉周子稱疾閒居寄心清尚悠然自娛翳翳  
衡門洋洋泌流曰琴曰書顧盼有儔飲河旣足  
自外皆休緬懷千載託契孤游

讀史述 九章

余讀史記有所感而述之

夷齊

二子讓國相將海隅天人革命絕景窮居采薇  
高歌慨想黃虞貞風凌俗爰感懦夫

箕子

去鄉之感猶有遲遲矧伊代謝觸物皆非哀哀  
箕子云胡能夷狡童之歌悽矣其悲

管鮑

知人未易相知實難淡美初交利乖歲寒管生

稱心鮑叔必安奇情雙亮令名俱完

程杵

遺生良難士爲知己望義如歸允伊二子程生  
揮劍懼茲餘恥令德永聞百代見紀

七十二弟子

恂恂舞雩莫日匪賢俱映日月共餐至言慟由  
才難感爲情牽回也早天賜獨長年

屈賈

進德脩業將以及時如彼稷契孰不願之嗟乎

二賢逢世多疑候詹寫志感鵬獻辭

韓非

豐狐隱穴以文自殘君子失時白首抱關巧行  
居災伎辯召患哀矣韓生竟死說難

魯二儒

易代隨時迷變則愚介介若人特爲貞夫德不  
百年汙我詩書逝然不顧被褐幽居

張長公

遠哉長公蕭然何事世路多端皆爲我異歛轡

竭來獨養其志寢迹窮年誰知斯意

東坡曰夷齊箕子蓋有感而云去之五  
百餘載吾猶識其意也

陶靖節集卷之六

陶靖節集卷之七

集聖賢群輔錄上

明由曉升級

必有受稅俗

成博受古諸

隕丘受延嬉

右燧人四佐燧人出天四佐出洛

宋均曰出

天所生出  
洛地所生也

金提主化俗

提一作堤

鳥明主建福

視默主災惡

紀通為中職

仲起為海陸

陽侯為江海

一本作江湖

右伏羲六佐六佐出世

宋均曰伏羲不及燧人故增二

佐出世人所生也

風后受金法

天老受天籙

五聖受道級

知命受糾俗

窺紀受變復

地典受州絡

力墨受準斥

力墨或作力牧

右黃帝七輔以上竝見論語摘輔象

時偉按上三條事出太古多不可解而

宋均分註杜撰如謂古諸為古諸侯於

義通乎故悉芟去

重

正木

該

正金

脩

熙

正竝水

右少昊四叔實能金木及水使重為勾

芒該為蓐收脩及熙為玄冥世不失職

遂濟窮桑見左傳蔡墨辭

義仲

春

義叔

夏

和仲

秋

和叔

冬

右羲和四子孔安國云即堯之四岳分

掌四岳諸侯鄭玄云堯既分陰陽為四

時命義仲和仲義叔和叔等為之官又

主方岳之事是為四岳

伯夷為陽伯

義仲之後為義伯

棄為夏伯

義叔之後為義伯

咎繇為秋伯

和仲之後為和伯

垂為冬伯

右八伯自義和後分置八伯舜元祀巡

狩每至其方各貢兩伯之樂大傳冬伯

後闕一人鄭玄云此上下有脫辭又百

工相和而歌慶雲八伯稽首而進者也

見尚書大傳

謹兜 共工 鯀 三苗

右四凶謂之渾敦窮奇檮杌饕餮

蒼舒 隤斨 檮戡 大臨 龍降 庭堅

仲容 叔達

右高陽氏才子八人齊聖廣淵明允篤

誠天下之民謂之八凱

伯奮 仲堪 叔獻 季仲 伯虎 仲熊

叔豹 季狸

右高辛氏才子八人忠肅恭懿宣慈惠  
和天下之民謂之八元從四凶至此悉

見左傳

禹作司空

棄作稷

契作司徒

咎繇作士

益作虞

垂作共工

伯夷作秩宗

龍作納言

夔典樂

右九官舜登帝位所選命見尚書

雄陶

方回

續牙

伯陽

東不訾

或云不識

秦不虛

或云不空

靈甫

右舜七友竝為歷山雷澤之游戰國策

顏斶云堯有九佐舜有七友而尸子只

載雄陶等六人不載靈甫皇甫士安作

逸士傳云視其友則雄陶方回續牙伯

陽東不訾秦不空靈甫之徒是為七子

與戰國策相應

禹

稷

契

皋陶

益

右舜五臣見論語已列九官中

禹

稷

契

皋陶

伯夷

垂

益

夔

右八師見楚辭七諫

伯夷 禹 稷

右三后伯夷降典制民惟刑禹平水土  
主名山川稷降播種農殖嘉穀三后成  
功惟殷於民漢太尉楊賜曰昔三后成  
功皐陶不與焉蓋吝之也見尚書甫刑  
後漢書

微子 箕子 比干

右殷三仁論語曰微子去之箕子爲之

奴比干諫而死孔子曰殷有三仁焉

伯夷 太公

陶公曰 右二老

闕天 太公望 南宮适 散宜生

右文王四友孔子曰文王有四臣丘亦  
得四友此四人則文王四鄰也

伯達 伯适 仲突 仲忽 叔夜 叔夏

季隨 季騮

右周八士見論語賈逵以爲文王時鄭



玄以為成王時也

伯邑考 武王發 管叔鮮 周公旦

蔡叔度 曹叔振鐸 霍叔武 邲叔處

康叔封 聃季載 一本無邲叔處有毛叔圉

右太姒十子太史公曰太姒十子周以

宗強見史記

周公旦 邵公奭 太公望 畢公 毛公

閔公 太顛 南宮适 散宜生 文母 太姒也

右周十紂見論語

秦公牙 吳班 孫尤 夫人冉贊 公子麋

右五王竝能相馬尸子曰古有五王之

相廼謂之王其貴之也

狐偃 趙衰 顛頡 魏武子 司空季子

右晉文公從亡五人

奄息 仲行 鍼虎

右三良子車氏之子秦穆公歿要以從

死詩人悼之為賦黃鳥見毛詩

子展賦草蟲 子西賦黍苗

子產賦隰桑

公孫段賦桑扈

伯有賦鶉之賁賁

子太叔賦野有蔓草

印段賦蟋蟀

右鄭七穆叔向曰鄭七穆其后亡乎及諸侯為宋之盟鄭伯享趙武于垂隴七卿皆從文子曰七卿從君以寵武也請皆賦以卒君貺亦以觀七子之志見左

傳

仲孫穀文伯

叔孫得臣莊叔

季孫行父文子

右三桓孔子曰三桓之子孫微矣見論語左傳

趙無恤襄子

范吉射昭子

智瑤襄子

荀寅文子

魏多襄子

韓不信簡子

右六族世為晉卿此六人寔弱晉國淳于越云卒有田常六卿之臣劉向亦曰田常復見於今六卿必起於漢見左傳

史記

儀封人 荷蕢 晨門 楚狂接輿 長沮

桀溺 荷蓀丈人 一作伯夷叔齊虞仲夷逸朱張柳下惠少連

右作者七人論語曰賢者避世其次避

地其次避色其次避言孔子曰作者七

人

德行 顏淵 閔子騫 冉伯牛 仲弓

言語 宰我 子貢

政事 冉有 季路

文學 子游 子夏

右四科見論語

顏淵 子貢 子路 子張

右孔子四友文王有胥附奔奏先後禦

侮謂之四鄰孟懿子曰夫子亦有四鄰

乎子曰吾有四友焉自吾得回門人益

親是非胥附乎自吾得賜遠方之士日

至是非奔奏乎自吾得師前有光後有

輝是非先後乎自吾得由惡言不至於

門是非禦侮乎見孔叢子

顏淵 仲弓 子路 宰我 子貢 公西華

右仲尼六侍志意不立子路侍儀服不

脩公西華侍禮不習子貢侍辭不辯宰

我侍亡忽古今顏回侍節小物冉伯牛

侍曰吾以夫六子自厲也見尸子

檀子 盼子 黔夫 種首

右齊威王四臣齊威王與魏惠王會田

於郊魏王問威王曰王有寶乎威王曰

無有魏王曰若寡人國雖小猶有徑寸

之珠照前後車各十二乘者十枚奈何

齊萬乘之國而無寶乎威王曰寡人之

所以為寶與王異吾臣有檀子者使守

南城則楚人不敢為寇東取泗上十二

諸侯皆來朝吾臣有盼子者使守高唐

則魏人不敢東漁於河吾臣有黔夫者

使守徐則燕人祭北門趙人祭西門徙

而從之者七十餘家吾臣有種首者使

備盜賊則道不拾遺以此為寶將以照  
千里豈直十二乘哉魏惠王慙不懌而  
去見史記及春秋後語

齊孟嘗君田文

魏信陵君無忌

趙平原君趙勝

楚春申君黃歇

右戰國四豪見史記

太子少傅留文成侯韓張良

相國鄼文終侯沛蕭何

楚王淮陰侯韓信

右三傑漢高祖曰此三人者皆人傑也

見漢書

園公

姓唐名秉字宣明陳留襄邑人常居園中故號園公見陳留志

綺里季

夏黃公

姓崔名廣字少通齊人隱居脩道號夏黃公見崔氏譜

角里先生

右商山四皓當秦之末俱隱上洛商山  
皇甫士安云竝河內軹人見漢書及皇

甫謚高士傳

太子太傅疎廣字仲翁

太子少傅疎受字公子

廣兄子也

右二疎東海人宣帝時授太子論語孝經各以老疾告退時人謂之二疎見漢

書

重合令子輿 櫟陽令子羽

東海太守子仲 兗州刺史子明

潁陽令子良

右郡決曹掾汝南周燕少卿之五子號

曰五龍各居一里子孫竝以儒素退讓

為業見周氏譜及汝南先賢傳

龔勝字君賓

龔舍字君倩 或曰長倩

右竝楚人皆治清節世號二龔見漢書

唐林字子高

唐尊字伯高

右竝沛人亦以潔履著名於成哀之世

號為二唐比楚二龔後皆仕王莽見漢

書左思曰二唐潔已乃點乃汚

平阿侯王譚

成都侯王商

紅陽侯王章

曲陽侯王根

高平侯王逢時

高平侯右竝以元后弟同日受封京師號曰五  
 侯竝奢豪富侈招賢下士谷永樓護皆  
 為賓客時人為之語曰谷子雲之筆札  
 樓君卿之唇舌張載詩曰富侈擬五侯  
 北海逢萌字子康北海徐房字平原  
 李曇字子雲平原王遵字君公  
 右皆懷德穢行不仕亂世相與為友時  
 人號之四子見後漢書嵇康高士傳  
 求仲羊仲

右二人不知何許人皆治車為業挫廉  
 逃名蔣元卿舍中有三徑不出惟二人  
 從之游時人謂之二仲見嵇康高士傳  
 太傅高密元侯南陽鄧禹字仲華  
 大司馬廣平忠侯南陽吳漢字子顏  
 左將軍膠東剛侯南陽賈復字君文  
 建威大將軍好時愍侯扶風耿弇字伯昭  
 執金吾雍奴威侯上谷寇恂字子翼  
 征西大將軍陽夏節侯潁川馮異字公孫

征南大將軍舞陽壯侯南陽岑彭字君然

征虜將軍潁陽成侯潁川祭遵字弟孫

太常靈壽侯信都邳彤字偉君

東郡太守東莞成侯鉅鹿耿純字伯山

上谷太守淮陰侯潁川王霸字元伯

左中郎將朗陵愍侯潁川臧宮字君翁

驃騎大將軍櫟陽侯馮翊景丹字孫卿

驃騎大將軍參蘧侯南陽杜茂字諸公

建義大將軍鬲侯南陽朱祐字仲先

驃騎將軍慎靖侯南陽劉隆字元伯

揚武將軍全椒侯南陽馬成字君遷

大司空阜成侯漁陽王梁字君嚴

衛尉安城忠侯潁川銚期字次兄

左馮翊安平侯漁陽蓋延字巨卿

捕虜將軍揚虛侯南陽馬武字子張

驍騎將軍昌城侯鉅鹿劉植字伯先

左將軍阿陵侯南陽任光字伯卿

豫章太守中水侯東萊李忠字仲都



左將軍槐里侯扶風萬脩字君游

琅邪太守祝阿侯南陽陳俊字子昭

積弩將軍昆陽威侯潁川傅俊字子衛

揚化將軍合肥侯潁川堅鐔字子伋

右河北二十八將光武所與定天下見

後漢書張衡東京賦云受鉞四七共工

以除

武威太守梁統字仲寧

金城太守庫鈞字巨公

張掖太守史苞字叔文

酒泉太守竺曾字巨公

焯煌太守辛彤字大房

右河西五守是時更始已為赤眉所害

隗囂密有異志統等五人共推竇融為

河西大將軍內撫吏民外禦寇戎東伐

隗囂歸心世祖克建功業見後漢書及

善文○時偉按善文未詳疑有脫誤

大鴻臚韋孟達

上黨太守公孫伯達

河陽長魏仲達

右扶風平陵人同時齊名世號三達孟  
達名彪丞相賢五世孫明帝時人見漢  
書及決錄

光祿大夫周舉

光祿大夫杜喬

光祿大夫周栩

尚書欒巴

青州刺史馮羨

兗州刺史郭遵

太尉長史劉班

侍御史張綱

右八使漢順帝時政在權宦官以賄成

周舉等議遣八使循行風俗同日俱發

天下號曰八使見張璠漢紀

平輿令韋順字叔文

順弟武陽令豹字季明

豹弟廣都長義字季節

右清河太守韋文高之三子皆以學行

知名時人號韋氏三君見京兆舊事

楊震字伯起

震子秉字叔節

秉子賜字伯獻

賜子彪字文先

右楊氏四公弘農華陰人自孝安至獻

帝七世父子以德業相繼為三公見續

漢書

袁安字邵公

安子敞字叔平

敞子湯字仲河

湯子逢字周陽

逢弟隗字次陽

右袁氏四世五公見續漢書

處士豫章徐穉字孺子

京兆韋著字休明

汝南袁閎字夏甫

彭城姜肱字伯淮

潁川李曇字子雲

右太傅汝南陳公時為尚書令與諸尚書悉名士也共薦此五人時號五處士見續漢書及善文

周子居

黃叔度

艾伯堅

郅伯向

封武興

盛孔叔

右汝南六孝廉太守李俵選此六人以應歲舉受版未行俵死子居等遂駐行喪俵妻於柩側下帷見之厲以宜行子居歎曰不有行者莫宣公不有止者莫

卹居於是與伯堅即日辭行封黃四人

畱隨柩車見杜元凱女戒

大將軍槐里侯扶風平陵竇武字游平天下忠誠竇游

平

太傅高陽鄉侯汝南平輿陳蕃字仲舉天下義府陳仲

舉

侍中河間樂成劉淑字仲承天下德弘劉仲承

右三君

少傅潁川襄城李膺字元禮天下模楷李元禮

司空山陽高平王暢字叔茂天下英秀王叔茂

太僕潁川陽城杜密字周甫天下良輔杜周甫

司隸校尉沛國朱寓字季陵天下水凌朱季陵

尚書會稽上虞魏朗字少英天下忠貞魏少英

沛國潁陰荀翊字伯條天下好交荀伯條

大司農博陵安平劉祐字伯祖天下稽古劉伯祖

太常蜀郡成都趙典字仲經天下才英趙仲經

右八俊

有道太原介休郭泰字林宗天下和雍郭林宗

太常陳畱園夏馥字子治

天下慕恃夏子治

尚書令河南鞏尹勳字伯元

天下英藩尹伯元

河南尹太山平陽羊陟字嗣祖

天下清苦羊嗣祖

議郎東郡陽平劉儒字叔林

天下珤金劉叔林

冀州刺史陳國項蔡衍字孟喜

天下雅志蔡孟喜

潁川太守渤海高城巴肅字恭祖

天下臥虎巴恭祖

議郎南陽安衆宗慈字孝初

天下通儒宗孝初

右八顧

後漢書無劉儒有范滂

御史中丞汝南召陵陳翔字子鱗

海內貴珍陳子鱗

衛尉山陽高平張儉字元節

海內忠烈張元節

太尉掾汝南細陽范滂字孟博

海內謇諤范孟博

蒙令山陽高平檀敷字文有

海內通士檀文有

洛陽令魯國孔昱字世元

海內才珍孔世元後漢書云字元世

太山太守渤海重合范康字仲真

海內彬彬范仲真

太尉掾南陽棘陽岑暉字公孝

海內珍好岑公孝

鎮南將軍荊州牧武城侯山陽高平劉表字景

升

海內所稱劉景升

右八及

後漢書無范滂有翟超卓

少府東萊曲城王商字伯義海內賢智王伯義後漢書作王章

郎中魯國蕃嚮字嘉景海內修整蕃嘉景

北海相陳畱已吾秦周字平王海內貞良秦平王

侍御史太山奉高胡母班字季皮海內珍奇胡母季皮

太尉掾潁川陰劉翊字子相海內光光劉子相

冀州刺史東平壽張王考字文祖海內依怙王文祖

陳畱相東平壽張張邈字孟卓海內嚴恪張孟卓

荊州刺史山陽湖陸度尚字博平海內清明度博平

右皆傾財竭已解釋怨結拯救危急謂

之八厨後漢書無劉翊有劉儒

從三君至此竝見三君八俊錄

太丘長潁川陳寔字仲弓

寔子大鴻臚紀字元方

紀弟司空掾諶字季方

右竝以高名號曰三君見甄表狀及邯

鄲淳紀碑

陶靖節集卷之七

陶靖節集卷之八  
 集聖賢群輔錄下  
 太尉河南杜喬字叔榮  
 太常燉煌張奐字然明  
 侍中河內向詡字甫興  
 太傅汝南陳蕃字仲舉  
 太尉沛國施延字君子  
 少府潁川李膺字元禮  
 司隸沛國朱寓字季陵

陶靖節集卷之八

集聖賢群輔錄下

太尉河南杜喬字叔榮  
 太常燉煌張奐字然明  
 侍中河內向詡字甫興  
 太傅汝南陳蕃字仲舉  
 太尉沛國施延字君子  
 少府潁川李膺字元禮  
 司隸沛國朱寓字季陵

太僕穎川杜密字周甫

大鴻臚穎川韓融字元長

司空穎川荀爽字慈明

司空清河房植字伯武

聘士彭城姜肱字伯淮

太尉下邳陳球字伯真

司空山陽王暢字叔茂

徵士陳畱申屠蟠字子龍

衛尉山陽張儉字元節

大司農北海鄭玄字康成

徵士樂安冉瑋字孟玉

太尉漢中李固字子堅

有道太原郭泰字林宗

益州刺史南陽朱穆字公叔

尚書會稽魏朗字少英

聘士豫章徐穉字孺子

度遼將軍安定皇甫規字威明

右魏文帝初為丞相魏王所旌表二十



四賢後明帝乃述撰其狀見文帝令及

甄表狀

太常燉煌張奐字然明

度遼將軍安定皇甫規字威明

太尉武威段熲字紀明

右涼州三明竝著威名於桓靈之世見

續漢書

韋權字孔衡弟瓚字孔玉

瓚弟矩字孔規

右太尉掾韋子才之三子皆脩仁義兄弟孝友逢盜賊一人病不能去兄弟相保兵至俱死時人稱之號韋氏三義見

三輔決錄

荀儉字伯慈儉弟緄字仲慈

緄弟靖字叔慈靖弟壽字慈光

壽弟汪字孟慈汪弟爽字慈明

爽弟肅字敬慈肅弟專字幼慈

右朗陵令潁川荀季和之八子竝有德

業時人號之八龍居西豪里渤海宛康  
知名士也時為潁陰令美之曰高陽氏  
才子八人遂改所居為高陽里見張璠  
漢紀及荀氏譜

公沙紹字子起

紹弟孚字允慈

北海耆舊傳稱

孚與荀爽共約出不得事貴勢而爽當董卓時位至司空後相見以爽違約割席而坐

孚弟恪字允讓

恪弟達字義則

達弟樊字義起

右北海公沙穆之五子竝有令名京師

號曰公沙五龍天下無雙穆亦名士也

見魏明帝甄表狀及後漢書

膠東令盧汜昭字興先

樂城令剛戴祈字子陵

潁陰令剛徐晏字孟平

涇令盧夏隱字叔世

州別駕蛇丘劉彬字文曜

一云世州

右濟北五龍少竝有異才皆稱神童當

桓靈之世時人號為五龍見濟北英賢

傳

孝廉杜陵金敞字元休

上計掾長陵第五巡字文休

上計掾杜陵韋端字甫休

右同郡齊名時人號之京兆三休竝以

光武元年察舉見三輔決錄

晉宣帝河南司馬懿字仲達

魏司空潁川陳群字長文

中領軍譙朱鑠字彥才

侍中濟陰吳質字季重

右魏文帝四友見晉紀

魏步兵校尉陳畱阮籍字嗣宗

中散大夫譙嵇康字叔夜

晉司徒河內山濤字巨源

建威參軍沛劉伶字伯倫

始平太守陳畱阮咸字仲容

散騎常侍河內向秀字子期

司徒琅邪王戎字濬冲

右魏嘉平中竝居河內山陽共為竹林之游世號竹林七賢見晉書魏書袁宏戴逵為傳孫統又為讚

吳範相風

劉惔占氣

趙達筭

皇象書

巖子卿碁

宋壽占夢

曹不興畫

為孫權畫屏風誤落筆點素因以為蠅權以為真蠅手彈不去

孤城鄭姥相

右吳八絕見張勃吳錄

陳畱董昶字仲道

琅琊王澄字平子

陳畱阮瞻字千里

瞻弟孚字遙集朗率多通大將軍王敦云方瞻有減故云八百

穎川庾敳字子嵩

陳畱謝鯤字幼輿

太山胡毋輔之字彥國

沙門于法龍

樂安光逸字孟祖

右晉中朝八達近世聞之故老

裴徽字文秀

裴楷字叔則徽弟

裴綽字季舒楷弟

裴瓚字國賓楷子

裴邈字景初欽子

裴遐字叔道瓚子

裴康字仲豫徽第二子

裴頴字逸民楷孫

王祥字休徵

王戎字濬冲父渾祥族子

王澄字平子衍弟

王導字茂弘覽孫子

王綏字萬子戎子

王衍字夷甫父父

王敦字處仲覽孫基第二子

王玄字睂子衍子

右河東八裴琅邪八王聞之於故老

王昶字文舒

王湛字處冲

王承字安期

王述字懷祖

王坦之字文度

杜畿字伯侯 杜恕字務伯

杜預字元凱 杜錫字世嘏

杜乂字弘治

右太原王京兆杜各稱五世盛德聞之於故老夫書籍所載及故老所傳善惡聞於世者蓋盡於此矣漢稱田叔孟舒等十人及田橫兩客魯八儒史竝失其名夫操行之難而姓名翳然所以撫卷長歎不能已已者也

八儒

夫子沒後散於天下設於中國成百氏之源  
 為綱紀之儒居環堵之室葺門圭竇甕牖繩  
 樞併日而食以道自居者有道之儒子思氏  
 之所行也衣冠中動作順大讓如慢小讓如  
 偽者子張氏之所行也顏氏傳詩為道為諷  
 諫之儒孟氏傳書為道為疎通致遠之儒漆  
 雕氏傳禮為道為恭儉莊敬之儒仲梁氏傳  
 樂為道以和陰陽為移風易俗之儒樂正氏


傳春秋為道為屬辭比事之儒公孫氏傳易  
 為道為潔淨精微之儒

三墨

不累於俗不飾於物不尊於名不忮於眾此  
 宋劔尹文之墨裘褐為衣跂蹻為服日夜不  
 休以自苦為極者相里勤五侯子之墨俱稱  
 經而背譎不同相謂別墨以堅白此苦獲已  
 齒鄧陵子之墨

宋庠私記云五孝傳至四八目之未陶

自為說曰書籍所載及故老所傳善惡  
聞於世者蓋盡於此即知其後無餘事  
矣篇後八儒三墨二條此似後人妄加  
輒別存之以俟博聞者



陶靖節集卷之八終

